

Jahresbericht Kitu 2016

Es isch tatsächlech so.....mir stöh scho wieder hie, drbi isches doch erscht grad gsi.....viu isch gange und passiert im letschte Jahr, und darum isches mängisch gar nid so schlimm, geit d Zit chli schnäuer düre.

Mir si mit üsne Kitu-Ching i Frühlig gstartet. Mir düe mit ihne chlättere und gumpe, springe und purzle, mängisch verarzte und tröschte, sie düe bäuele und hüpfle, mir düe zuelose und motiviere, zäme düe mir lache, stune und begeischtere.

Wenns Wätter zueloht, si ou mir dusse adsträffe, und do chöi d Ching wie die „Grosse“ i Sang gumpe, so schnäu wie mögloch sprinte und die neuschte Wurftechnik usprobiere. Dir würdet stune, was es aues für Möglicheite git, so es Bäueli ds schiesse ☺

De heisst aber ou im Summer, vo dä Chindsgiabgänger Abschied ds näh, was üs immer wieder isch schwär gfaue, hei mir doch die Chnöpf nach 2 Jahr ou gärn übercho. Guet grüschtet lö mir sie i die nächshti Turnstuefe zieh. Ir Abschlussstung dörfe mir geng ufe Bsuech vor Meitschiriegeleiterin und vom Jugileiter zeue, wo sech chöme cho vorsteue. MERCI viu mou!

Nach dä Summerferie simer de schier überrennt worde.....bi 30 Ching hei mir ufhöre zeue.....es het gwuslet und gwirplet ir Haue, es isch es luschtigs Biud gsi. Es steut sech aber oft ou use, dass ds einte oder angere Ching no ds chli isch, und lieber zumene spätere Zitpunkt wieder chunt. So isch ä gäbigi Gruppegrössi entstange.

Die fröhliche Bande het de am Soirée ihre gross Uftritt uf dr Bühni gha. Unger dr Leitig vor Steffi und vom Gabi hei sie mit viu Fliss und Elan dr Äntetanz zeigt und aune viu Freud gmacht drmit.

Mit ere Wiehnachtsstung hei mir üses Kitu-Jahr beändet.

Mittlerwile si üsi Nachfougerinne am Würke. Tanja Schenker und s Gabi Reber hei mit viu Freud und Motivation ds Rueder vom Kitu übernoh. Mir wünsche euch beidne witerhin ganz viu Freud i däm Amt.

Ä bsungrige Dank geit das Jahr a di, Ste. Du hesch mi im Herbscht vom Kitu entbunde, wos mi amene angere Ort viu meh het brucht. Du hesch aues gmänätscht, und mit em Gabi sogar ä Ersatz gfunge zum Leite und für uf d Bühni. So hani das chöne gsorget gä. Danke viu viu mou.

Aune es riese- grosses Merci, wo üs die Jahr düre hei ungerstütz, üs ihri Ching hei avertrout und mit üs hei ghufe, a däm Chäreli ds zieh.

Viu Erfoug und Dankbarkeit im neue Jahr.

Kitu-Leiterin Claudia